

# Signurs territorials dal temp autmedieval

## Part 3: Famiglias d'alta noblezza (cuntuaziun)

### De Razén (Brun)

Famiglia da libers d'alta noblezza dal 12avel–15avel tschientaner, estinguida il 1458. Numnada tenor il chastè da Razén, attestà per l'emprima giada il 1282. Tudestg Rhäzüns; la scripziun «Räzüns» è antiquada. Il num da famiglia Brun deriva probablmain da barun (il stan ierarchic-social dals Razén). La derivanza da la famiglia n'è betg clera. A partir da la mesadad dal 13avel tschientaner era ella ina da las famiglias noblas las pli respectadas en la Rezia. Ils baruns, versads en faidas, èn vegnids engaschads en ils onns 1330 l'emprim da l'uestg da Cuira per cumbatter cunter Donat de Vaz, alura da l'avat da Mustér cunter ils Quatter Chantuns. Da quel temp enavant è creschida la paisa politica e militar da la famiglia. En il 14avel e 15avel tschientaner era ella parentada cun ils signurs de Sax-Mesau, ils Orellis, Belmonts, Montalts, Matschs, Werdenbergs e Stoffelns. La fossa dals baruns de Razén sa chattava a Razén, sper l'antieriura baselgia parochiala da S. Paul. Il signuradi da Razén vegniva dà en ierta mintgamai mo ad in sulet member da la famiglia. L'emprim represchentant attestà da la famiglia è Arnold (menziunà il 1137–39). Cun Heinrich III, nobilis vir (menziunà il 1251–88), èn ils de Razén daventads pli perceptibels: quel ha manà ina coaliziun da nobels retics cunter l'uestg da Cuira ch'è vegnida battida il 1255 a Domat. Sia fossa aveva el tscherni il 1288 en la catedrala da Cuira. Suenter il 1350 han ils de Razén extendì lur domini vers la Surselva, la Tumleasta e la Mantogna. Il represchentant il pli impurtant da la famiglia è Ulrich II. Lungas charplinas cun l'uestg da Cuira (oravant tut per il domini en la Tumleasta e sin la Mantogna) a la sava dal 15avel tschientaner han consumà dal tutfatg las forzas militaras ed economicas dals baruns e terminà lur fasa da success. Il 1395 han las charplinas surmenziunadas manà a la fundaziun da la Lia Sura (dals signurs), la precursora

da la Lia Grischa ch'era ils baruns de Razén han affirmà tras engrament a Trun il 1424. Suenter la mort da Gieri (il davos represchentant masculin da la famiglia) l'onn 1458, è il signuradi da Razén vegnì dividi.

Linus Bühler

### De Sax [de Sacco, de Sax-Mesau]

Famiglia d'alta noblezza retica, baruns e conts. Num original: de Sacco. La derivanza da la famiglia n'è betg sclerida. Il svilup da lur pussanza dad omaduas varts da las Alps inditgescha in origin da noblezza curretica. Ils Sax eran parentads cun ils signurs da Torre, probablmain na sa tracti dentant betg d'ina lingia pli giuvna da questa famiglia. Lur territori suveran cumpigliava al sid las vals Mesau e Calanca cun il chastè da Mesocco sco center da domini ed en la Val dal Rain il signuradi da Sax cun ils chastels da Sax, Forstegg e Frischenberg. L'emprim represchentant attestà da la famiglia è il 1137/39 Eberhard de Sacco. Albrecht, menziunà il 1188, vala sco il progenitur da la famiglia. Heinrich, probablmain ses frar, ha reorganisà en ils onns 1200, sco priur e decan, l'administraziun da la claustra da Son Gagl. Ses dus nevs, l'avat Ulrich e Heinrich I, han profità da la pussanza da questa claustra e da lur relaziun cun ils Stauffers per rinforzar lur pussanza. Las avugadias sur Mustér, Faveras e Clanx (sper Appenzell) èn idas a la famiglia tranter il 1208 ed il 1213. En il Mesau possedeavan els tut ils dretgs suverans impurtants. Il 1220 han els era fatg valair dretgs en la Val dal Blegn ed en la Leventina. Qua tras aveva la famiglia Sax cuntanschi si'emprima culminaziun da pussanza. Sut ils biadis da Heinrich è il domini vegnì dividi en ils onns 1248. Ils bains en il sid e las avugadias da Clanx e Faveras èn ids a Heinrich II ed Albrecht (menziunà 1236–75), ils progeniturs da la lingia dals Sax-Mesau; il signuradi da Sax ha survegnì Ulrich (menziunà il 1236–57), il fundatur da la lingia dals Sax-Hohensax.



Il chastè da Razén (attestà il 1282) ha dà il num als baruns de Razén.

Ils baruns ed, a partir dal 1413, conts da Sax-Mesau han expandì lur domini en il 14avel tschientaner. Il 1390 han els obtegnì il signuradi da Castrisch e da Belmont cun las dretgiras da Glion, Lumnezia, Flem e Val S. Pieder. Il cont Johann è stà participà il 1424 cun quests dominis al svilup da la Lia da Glion (1395) a la Lia Grischa. Sut ses frar Albert han ils Sax expandì il 1403, cun la conquista da Blinzuna e da la Val dal Blegn, vers il sid. Alura èn els sa muvids tranter Milaun, la Confederaziun e la Lia Grischa. Els èn vegnids en conflict cun la politica d'expansiun da la Confederaziun ed èn vegnids sfurzads il 1407 ad in dretg da conburgais cun Uri e Sursilvania. Il 1419–22 han els stui ceder lur conquistats al sid als Confederads. Il 1480 ha vendì Johann Peter il Mesau al cont Gian Giacomo Trivulzio da Milaun, terminond qua tras il domini dals Sax al sid da las Alps. La vendita dal possess en la Surselva a l'uestg da Cuira (1483) ha mess ina fin a la pussanza da la famiglia en il Grischun. A la fin dal 13avel tschientaner èn pliras lingias secundaras dals Sax-Mesau (Sax-Grono, Sax-Palazio, Sax-Norantola) stadas participadas temporarment al domini. Roms dals Sax èn era sa furmads a Vuorz ed a Trun.

Anna-Maria Deplazes-Haefliger

### Von [de] Tirol

En il temp autmedieval han ils uestgs da Cuira possedì en il Vnuost, ultra da la pussanza diocesan-ecclesiastica, era dretgs territorials seculars. A partir dal 12avel tschientaner èn ils signurs feudals ils pli pussants dal Vnuost, ils chastellans von Matsch, entrads sco vasals e ministerials en ina relaziun d'obligaziun envers l'uestg da Cuira. Ils conts de Tirol han acquistà il domini en la regiun da l'Adisch inferiura (Meraun), en la Val da l'Eisack, en il Pustertal sco era en las vals da l'En. Il conflict cun l'uestg da Cuira, che riguardava il Tirol anc il 1283 sco feud episcopal, han ils conts de Tirol decidì successivament en lur favur. L'uestg da Cuira ha fatg valair ses dretgs suverans multifars sur la gleiud da la Chadé en il Vnuost Superiur fin viaden il 17avel tschientaner. A partir dal 10avel tschientaner han ils conts de Tirol possedì era dretgs da contadi en l'Engiadina Bassa ed a partir dal 14avel tschientaner l'avugadia en las Otg Dretgiras, da las qualas ils Habsburgais èn sa patronads a partir dals onns 1460. Il 1478 ha il duca Sigmund d'Austria confermà a las dretgiras tut ils dretgs e tut las libertads ed ha garantì ad ellas l'exemziun da dazi en il Tirol. La gleiud da quests territoris eran d'ina vart libers Grischuns resp. alliads en la Repu-

blica da las Trais Lias, da l'autra vart subdits austriacs suttamess a la giustia ed a l'administraziun civila tirolaisa. Els han cumprà ora quels dretgs austriacs pir il 1649–52.

(red.)

### Von Habsburg

Il 1282, suenter la mort dal cont Rudolf V von Rapperswil, è l'imperatur Rudolf von Habsburg sa patronà da l'avugadia imperiala sur la Val d'Ursera ch'el ha alura cedi a ses figls. Il 1382 ha la val obtegnì la brev da libertad ed il 1410 il dretg da vischinadi da l'Uri ed è ida qua tras a perder per ils Habsburgais e per la claustra da Mustér ch'aveva pudì mantegnair tscherts dretgs en la val.

Il 1325 ha Ludwig von Bayern reconuschì l'imperatur Friedrich von Habsburg sco cunregent, ma il profit è stà pitschen. En consequenza è ses frar Albrecht II von Habsburg s'occupà pli intensivament da l'extensiu dal domini territorial ed economic, oravant tut en l'Austria. Il 1335 han ils Habsburgais acquistà il domini en il ducadi imperial da la Carinzia ed il 1363 ha la duchessa Margareta Maultasch cedi il Tirol al duca Rudolf IV von Habsburg. Il Tirol furmava ina punt tranter il possess dals Habsburgais en Rezia, en la Confederaziun ed en l'Austria e vegniva regi dal cont dal Tirol che residava a la curt da Puntina. Il 1363 han ils von Matsch cedi sut squitsch politic lur feud da Tarasp al cont von Tirol. La pressiu creschenta da vart da quest vischin nov e privlus è era sa manifestada en la fundaziun da la Lia da la Chadé (1367) ed en las faidas dal 1388–1415 tranter l'uestg Hartmann II von Werdenberg-Sargans (sustegnì dals signurs ed avugads von Matsch) cunter l'Austria e Razén. Il 1464 ha Ulrich IX von Matsch vendì il chastè ed il domini da Tarasp per 2000 renchs al duca Sigmund von Habsburg. Il passadi dal domini dals von Matsch als Habsburgais ha gi tranter auter per consequenza che Tarasp è restà catolic. Quest feud tirolais è restà en possess dals Habsburgais fin il 1803, daventond «ina nauscha spina en l'egl» da l'Engiadina Bassa e da la Republica retica (Jacob Anton Vulpius, «Historia Raetica»). Dal 1421–1803 possedeava l'Austria era l'avugadia legitima sur la claustra da Müstair (exequida illegitimament sco feud ereditar).

Adolf Collenberg

### De Belmont

Schlatta da baruns libers dal 12avel–14avel tschientaner, cun possess oravant tut a Castrisch ed a Flem. Fin enturn il 1200 residava ils Belmont en il chastè da Belmont a Fidaz, pli tard en quel da Casti a Castrisch ed en il chastè ch'els avevan la-

schà eriger il 1250 sin la Tuma Casti a Domat. Els possedeavan ils dretgs da giurisdiziun en la Foppa, en la Lumnezia ed a Flem ed avevan l'avugadia sur la curtis a Cuira ch'appartegnava a la claustra da Faveras. Ultra da quai avevan els il patronadi sur la baselgia da vallada da S. Vintschegn a Pleif/Vella e la collatura da duas chapluttas affiliadas a Sagogn. Il lieu da sepultura dals Belmont è stà oriundament S. Gliezi/Cuira, pli tard la catedrala da Cuira, a partir dal 14avel tschientaner Castrisch. Ils Belmont eran parentads tranter auter cun ils de Vaz, de Frauenberg, de Montalt e de Razén. L'emprim represchentant enconuschent da la famiglia è Lütfried che comparà il 1139 tranter las perditgas da la donaziun dals von Gamentingen. Tenor indizis han descendents uertavels da quel purtà en ils 60 onns sequents il num de Castrisch e reprennì il num de Belmont pir suenter la cumparsa d'ina famiglia Castrisch da noblezza inferiura. Heinrich (attestà dal 1252–62) è stà l'emprim da la famiglia ch'ha purtà consequentament il titel da noblezza. Il 1255 è el vegnì battì, ensemen cun auters nobels, da l'uestg da Cuira en ina battaglia a Domat. En consequenza han ils Belmont pers il chastè a Domat, erigi pauc avant cun agid d'alliads, ma restituì ad els sco feud episcopal. Il figl da Heinrich, Heinrich il Giuven (attestà dal 1267–1307), ha studegià a Bologna il 1267. El aveva stretgas relaziuns cun ils de Vaz e cun ses frar Konrad, uestg da Cuira. En il 14avel tschientaner han difficultads economicas sfurzà la famiglia da vender u impegnar ina part dal possess. L'ultim descendent masculin dals Belmont, Ulrich Walter, biadi da Heinrich il Giuven, è s'uni il 1352 cun success cun auters nobels (baruns de Montalt e de Razén) e cun purs da la regiun per far frunt en la Battaglia da Porclas al Mundaun a las ambiziuns d'expansiun territorials dals Werdenbergs. Sia sora Adelheid ha maridà en emprima lètg Heinrich IV de Razén. Tras ella è ida l'ier-ta dals Belmont a sia figlia Elisabeth ed al consort Kaspar von Sax-Mesau.

Martin Leonhard



Heinrich II de Sax-Mesau (attestà il 1235–58) è probablmain identic cun l'enconuschent poet e chantadur lyric documentà en il Codex Manesse (14avel tschientaner).

## Lexicon Istoric Retic

Il LIR cumpiglia bundant 3100 artigels (geografics, tematics, artitgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: [www.e-lir.ch](http://www.e-lir.ch); versiun stampada: [www.casanova.ch](http://www.casanova.ch) u en mintga libreria.